



Broj: 01,02,03,03/11-05-1-1225/17  
Sarajevo, 28.6.2017.

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO:	11-07-2017		
Organizaciona jedinica	Klasifikaciona oznaka	Redni broj	Broj priloza

B

## IZVJEŠTAJ

### s plenarnog zasjedanja Parlamentarne skupštine Procesa saradnje u Jugoistočnoj Evropi (SEECP)

Zagreb, 8. – 10. juni 2017.

Delegacija Parlamentarne skupštine BiH u Parlamentarnoj skupštini SEECP-a, u sastavu: predsjedavajući Delegacije Šafik Džaferović, prvi zamjenik predsjedavajućeg Bariša Čolak, drugi zamjenik Momčilo Novaković i članica Delegacije Hanka Vajzović, učestvovala je na plenarnoj sjednici Parlamentarne skupštine SEECP-a, održanoj u Zagrebu 10. juna 2017. godine.

Četvrtoj plenarnoj sjednici Parlamentarne skupštine SEECP-a prethodila su dva sastanka Stalnog komiteta, te sastanci generalnih komiteta.

Sastanku Stalnog komiteta PSSEECP-a, koji je održan 8. juna 2017., prisustvovala su delegacije Ankare, Atine, Beograda, Bukurešta, Ljubljane, Sarajeva, Sofije, Podgorice i Zagreba, dok su Skoplje i Tirana bili predstavljeni na nivou nacionalnih koordinatora, a Priština na nivou generalnog sekretara Parlamenta. Delegacija Kišinjeva nije prisustvovala sastanku. Sastankom je predsjedavao šef Delegacije Hrvatskog sabora u PSSEECP-a Predrag Matić.

Cilj sastanka bio je finaliziranje teksta Završne deklaracije s obzirom na to da nije postignut konsenzus o članu 14. na sastanku Stalnog komiteta u Opatiji 20. maja. U skladu sa zaključcima Stalnog komiteta, Sofija je 29. maja pisanim putem predložila novi tekst spornog člana.

Na početku rasprave o članu 14. predsjedavajući Matić rekao je kako Zagreb podržava novi tekst Sofije te pozvao da se u raspravu uključe prvenstveno delegacije koje se protive novom prijedlogu Sofije. Zastupnik Ljubljane kazao je kako ne prihvata kompromis Sofije, te se ponovo pristupilo iznalaženju kompromisnog prijedloga.

Na kraju, postignut je dogovor svih delegacija kako će Deklaracija ipak imati 15 tačaka, a 14. član glasiti će:

*“Naglasiti da je postojanje potpuno funkcionalnog Sekretarijata važno za povećanje efikasnosti naše skupštine i obavezati na nastavak rada i raspravu o ovom pitanju na konstruktivan i temeljit način.”*

Sastanci generalnih komiteta održani su 9. juna 2017. Prvo je održan sastanak Generalnog komiteta za privredu, infrastrukturu i energiju. Komitetom je predsjedavao šef Delegacije Hrvatskog sabora u PSSEEC-a Predrag Matić. Kandidaturu za predsjedavanje Generalnim komitetom naredne godine iskazala je Ankara, izvjestilac je bio Cengiz Aydoğdu. Sve delegacije prihvatile su kandidaturu, a tema izvještaja bit će dostavljena naknadno.

Zatim je uslijedio sastanak Generalnog komiteta za pravosuđe, unutrašnje poslove i sigurnosnu saradnju kojim je, također, predsjedavao šef Delegacije Hrvatskog sabora u PSSEEC-a Predrag Matić. Kandidaturu za predsjedavanje Generalnim komitetom iskazalo je Sarajevo, izvjestilac je bio Bariša Čolak. Sve delegacije prihvatile su kandidaturu, a tema izvještaja bit će dostavljena naknadno.

Na kraju je održan sastanak Generalnog komiteta za socijalni razvoj, obrazovanje, istraživanje i nauku koji je vodio predsjednik Generalnog komiteta Hakan Çavuşoğlu, Ankara. Zastupnik Ljubljane predložio je zastupnika Podgorice Radula Novovića za predsjedavajućeg i izvjestioca Generalnog komiteta. Sve delegacije prihvatile su kandidaturu a tema izvještaja bit će dostavljena naknadno.

Drugi sastanak Stalnog komiteta PSSEEC-a održan je 9. juna 2017. s ciljem usvajanja Nacrta radnog programa za 2017.-2018. Sastanku su prisustvovala sve delegacije osim Kišinjeva i program je usvojen bez rasprave.

Sastanak Trojke održan je 10. juna 2017. Trojku čine predsjednici parlamenata sadašnje, prethodne i zemlje koja naredna predsjedava Skupštinom. Na sastanku su učestvovala delegacije Zagreba (predsjednik Parlamenta Gordan Jandroković), Sofije (zastupnice Snezhana Dukova i Diana Yordanova) i Ljubljane (predsjednik Skupštine Milan Brglez i zastupnik Branko Zorman).

Predsjednik Jandroković pozdravio je članove Trojke i zahvalio Sofiji na prošlom uspješnom predsjedavanju Skupštinom te poželio Ljubljani uspješno predsjedavanje u narednih godinu dana.

Predsjednik Skupštine, Ljubljana, Milan Brglez naglasio je kako je važno da se nastavi na daljnjoj institucionalizaciji Skupštine te da je potrebno koristiti sve *know-how* informacije i tehnike prijašnjih predsjedavanja kako bi se našla najbolja rješenja. Rekao je kako ne želi da ova skupština bude samo diplomatski forum, jer je ona, prije svega, inkluzivna organizacija, ali i nadasve specifična, budući da okuplja i članice Evropske unije i nečlanice Unije, ali i kandidatkinje za članstvo. Dodao je kako je parlamentarni aspekt SEEC-a podrška izvršnom nivou SEEC-a, ali da parlamenti trebaju dati svoj jači *input*.

Šefica delegacije Parlamenta, Sofija, Snezhana Dukova rekla je kako je impresionirana dobrim odnosima unutar Parlamentarne skupštine, ali i dodala kako se na teritoriji jugoistoka Evrope događaju i zabrinjavajuće situacije. Naglasila je kako trenutna Trojka ima veliki značaj jer je čine tri članice Evropske unije te dodala kako Sofija iduće godine preuzima predsjedavanje Vijećem Evropske unije. Uputila je Ljubljani upit u vezi sa Stalnim sekretarijatom Skupštine, te iskazala želju za rješavanje tog problema.

Na plenarnoj sjednici učestvovala su sve delegacije, a Priština je bila predstavljena na nivou generalnog sekretara Skupštine. Iz međunarodnih organizacija plenarnoj sjednici prisustvovali su predstavnici PAM-a, BA-a, RCC-a i RSPCSEE-a. U skladu s Poslovníkom Parlamentarne skupštine SEECIP-a na plenarnoj sjednici obraćaju se predsjednici parlamenata, odnosno predsjedavajući delegacija. Ovogodišnja tema plenarne sjednice bila je „Veza-saradnja-komunikacija: put naprijed“.

U ime naše delegacije plenumu se obratio predsjedavajući Delegacije Šefik Džaferović. Rekao je da kada je u pitanju tema „Veza - saradnja - komunikacija: kako naprijed“, njegov odgovor je da moramo naći načina kako da u svim oblastima kojima se bavi ovaj forum idemo naprijed; to su ekonomija, infrastruktura, energija, pravda, unutrašnji poslovi, sigurnosna saradnja, društveni razvoj, obrazovanje, istraživanje, nauka - dakle u svim oblastima. Skrenuo je pažnju na one tačke iz Završne deklaracije koje govore o proaktivnoj saradnji s Evropskim parlamentom jer ova regionalna inicijativa treba unaprijediti saradnju s EU u svim aspektima te postavio pitanje zašto ne bismo promovirali ideju da EU ima strategiju ekonomskog razvoja regiona jugoistočne Evrope. Istakao je i drugo pitanje sadržano u Završnoj deklaraciji, a ono se tiče programa usmjerenih na što je moguće više slobodan protok ljudi, robe, kapitala i usluga. Na kraju izlaganja, predsjedavajući Džaferović rekao je da trebamo učiniti sve u naporima s EU i između sebe kako bismo što je moguće više učinili slobodnim protok ljudi, robe, kapitala i usluga među našim zemljama.


Plenarna sjednica završena je usvajanjem Završne deklaracije, izvještaja tri generalna komiteta Skupštine, rezolucija tri generalna komiteta Skupštine i radnog programa za 2017.-2018. godinu kada će zemlja predsjedavajuća biti Republika Slovenija.

Izvještaj pripremila  
Sekretarka Delegacije  
Jadranka Radović

Izvještaj odobrili:

Predsjedavajući Predstavničkog doma  
Parlamentarne skupštine BiH

Šefik Džaferović



Predsjedavajući Doma naroda  
Parlamentarne skupštine BiH

Bariša Čolak



Dostaviti:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju Sekretarijata Parlamentarne skupštine BiH
- Komisiji za vanjske poslove Predstavničkog doma
- Komisija za vanjsku i trgovinsku politiku, carine, saobraćaj i komunikacije Doma naroda
- a/a